



A Delbertus filius Heinrici Marchionis atque nepos Leopoldi primi extitit. Itaque post patris obitum Austriæ Marchio electus, eam per triginta duos annos magna gloria & felicitate gubernavit. Habuit is Adelheidam Petri regis Vngariæ (qui S. Stephano primo eius regni Christiano principi successit) sororem in uxorem. Cum itaque Vngari factiosi in odium Petri alium regem creassent, Abbam nomine, atque Petrum expulissent, is se ad Adelbertum affinem suum contulit atque eius opem imploravit. Vnde Vngari maximo exercitu Austriam irrumpentes, partem eius occuparunt. Erat tum Heinricus tertius Imperator bello

Lotharingico impeditus, qui indignè Hungarorum iniuriam ferens, Adelberto suam operam est pollicitus, atque eum hortatur ut interea hostibus fortiter resistat.